

## 醉翁亭記

- 1 環滁皆山也 其西南諸峰
- 2 林壑尤美 望之蔚然而深秀者 瑯琊也
- 3 山行六七里 漸聞水聲潺潺 而瀉出于兩峰之間者 醴泉也
- 4 峰回路轉 有亭翼然 臨于泉上者 醉翁亭也
- 5 作亭者誰 山之僧智仙也
- 6 名之者誰 太守自謂也 太守與客 來飲于此
- 7 飲少輒醉 而年又最高 故自號曰醉翁也
- 8 醉翁之意 不在酒 在乎山水之間也
- 9 山水之樂 得之心而寓之酒也
- 10 若夫 日出而林霏開 雲歸而巖穴暝
- 11 晦明變化者 山間之朝暮也
- 12 野芳發而幽香 佳木秀而繁陰 風霜高潔 水落而石出者
- 13 山間之四時也 朝而往 暮而歸 四時之景

14 不同而樂亦無窮也

15 至於負者歌于途 行者休于樹

16 前者呼 後者應 偃僂提携 往來而不絕者 滁人遊也

17 臨溪而漁 溪深而魚肥 釀泉爲酒 泉香而酒冽

18 山肴野蔌 雜然而前陳者 太守宴也

19 宴酣之樂 非絲非竹 射者中 奕者勝

20 觥籌交錯 起坐而喧譁者 衆賓歡也

21 蒼顏白髮 頽乎其間者 太守醉也

22 已而夕陽在山 人影散亂 太守歸而賓客從也

23 樹林陰翳 鳴聲上下 遊人去而禽鳥樂也

24 然而禽鳥 知山林之樂 而不知人之樂

25 人知從太守遊而樂 而不知太守之樂其樂也

26 醉能同其樂 醒能述以文者 太守也

27 太守謂誰 廬陵歐陽修也

## 陳情表

- 1 臣以險釁 夙遭愍凶 生孩六月 慈父見背
- 2 行年四歲 舅奪母志 祖母劉閔臣孤弱 躬親撫養
- 3 臣少多疾病 九歲不行 零丁孤苦 至于成立
- 4 既無叔伯 終鮮兄弟 門衰祚薄 晚有兒息
- 5 外無荇功強近之親 內無應門五尺之童 茕茕孑立 形影相吊
- 6 而劉夙嬰疾病 常在牀褥 臣侍湯藥 未嘗廢離
- 7 逮奉聖朝 沐浴清化 前太守臣逵 察臣孝廉
- 8 後刺史臣榮 舉臣秀才 臣以供養無主 辭不赴命
- 9 會詔書特下 拜臣郎中 尋蒙國恩 除臣洗馬
- 10 猥以微賤 當侍東宮 非臣隕首所能上報
- 11 臣具以表聞 辭不就職 詔書切峻 責臣逋慢
- 12 郡縣逼迫 催臣上道 州司臨門 急於星火
- 13 臣欲奉詔奔馳 則以劉病日篤 欲苟順私情 則告訴不許

14 臣之進退 實爲狼狽 伏惟 聖朝以孝治天下

15 凡在故老 猶蒙矜育 況臣孤苦 特爲尤甚

16 且臣 少事僞朝 歷職郎署 本圖宦達 不矜名節

17 今臣 亡國賤俘 至微至陋 過蒙拔擢

18 豈敢盤桓 有所希冀 但以劉日薄西山

19 氣息奄奄 人命危淺 朝不慮夕

20 臣無祖母 無以至今日 祖母無臣 無以終餘年

21 母孫二人 更相爲命 是以區區不能廢遠

22 臣密 今年四十有四 祖母劉今年九十有六

23 是臣盡節於陛下之日 長 報劉之日 短也

24 烏鳥私情 願乞終養 臣之辛苦 非獨蜀之人士

25 及二州牧伯所見明知 皇天后土 實所共鑑 願陛下

26 矜憫愚誠 聽臣微志 庶劉僥倖 卒保餘年

27 臣生當隕首 死當結草 臣不勝怖懼之情 謹拜表以聞

## 秋聲賦

- 1 歐陽子方夜讀書 聞有聲自西南來者 悚然而聽之曰 異哉
- 2 初淅瀝以蕭颯 忽奔騰而澎湃 如波濤夜驚 風雨驟至
- 3 其觸於物也 鏦鏦錚錚 金鐵皆鳴 又如赴敵之兵
- 4 銜枚疾走 不聞號令 但聞人馬之行聲
- 5 予謂童子 此何聲也 汝出視之
- 6 童子曰 星月皎潔 明河在天 四無人聲 聲在樹間
- 7 予曰 噫嘻 悲哉 此秋聲也 胡爲乎來哉
- 8 蓋夫秋之爲狀也 其色慘淡 煙霏雲斂
- 9 其容清明 天高日晶 其氣慄冽 砭人肌骨
- 10 其意蕭條 山川寂寥 故其爲聲也 淒淒切切
- 11 呼號憤發 豐草綠縟而爭茂 佳木蔥蘢而可悅
- 12 草拂之而色變 木遭之而葉脫 其所以摧敗零落者 乃其一氣之餘烈

13 夫秋 刑官也 於時爲陰 又兵象也 於行爲金

14 是謂天地之義氣 常以肅殺而爲心 天之於物 春生秋實

15 故其在樂也 商聲主西方之音 夷則爲七月之律

16 商 傷也 物既老而悲傷 夷 戮也 物過盛而當殺

17 嗟乎 草木無情 有時飄零 人爲動物 惟物之靈

18 百憂感其心 萬事勞其形 有動于中 必搖其精

19 而況思其力之所不及 憂其智之所不能 宜其渥然丹者爲槁木

20 黧然黑者爲星星 奈何以非金石之質 欲與草木而爭榮

21 念誰爲之戕賊 亦何恨乎秋聲 童子莫對 垂頭而睡

22 但聞四壁 蟲聲唧唧 如助余之歎息

## 上秦皇逐客書

1 臣聞吏議逐客 竊以爲過矣

2 昔者繆公求士 西取由余於戎 東得百里奚於宛 迎蹇叔於宋 來邳

豹公孫支於晉

3 此五子者 不產於秦 而繆公用之 并國二十 遂霸西戎

4 孝公用商鞅之法 移風易俗 民以殷盛 國以富彊 百姓樂用 諸侯親

服 獲楚魏之師 舉地千里 至今治彊

5 惠王用張儀之計 拔三千之地 西并巴蜀 北收上郡 南取漢中 包九

夷 制鄢郢 東據成臯之險 割膏腴之壤 遂散六國之從 使之西面事秦

功施到今

6 昭王得范雎 廢穰侯 逐華陽 彊公室 杜私門 蠶食諸侯 使秦成帝業

7 此四君者 皆以客之功

8 由此觀之 客何負於秦哉

9 向使四君 却客而不內 疏士而不用 是使國無富利之實 以秦無彊

大之名也

10 今陛下致昆山之玉 有隨和之寶 垂明月之珠 服太阿之劍 乘纖離

之馬 建翠鳳之旗 樹靈鼉之鼓

11 此數寶者 秦不生一焉 而陛下說之 何也

12 必秦國之所生然後可 則是夜光之璧 不飾朝廷 犀象之器 不爲玩

好 鄭衛之女 不充後宮 而駿良馱駟 不實外廄 江南金錫 不爲用 西

蜀丹青 不爲采

13 所以飾後宮 充下陳 娛心意 說耳目者 必出於秦然後可 則是宛

珠之簪 傅璣之珥 阿縞之衣 錦繡之飾 不進於前 而隨俗雅化 佳冶

窈窕趙女 不立於側也

14 夫擊甕叩缶 彈箏搏髀而歌呼鳴鳴 快耳目者 真秦之聲也

15 鄭衛桑間 昭虞象武者 異國之樂也

16 今棄擊甕而就鄭衛 退彈箏而取昭虞

17 若是者何也

18 快意當前 適觀而已矣



19 今取人則不然 不問可否 不論曲直 非秦者去 爲客者逐

20 然則是所重者 在乎色樂珠玉 而所輕者 在乎人民也

21 此非所以跨海內制諸侯之術也

22 臣聞地廣者粟多 國大者人衆 兵強則士勇

23 是以泰山不辭土壤 故能成其大 河海不擇細流 故能就其深

24 王者不却衆庶 故能明其德

25 是以地無四方 民無異國 四時充美 鬼神降福 此五帝三王之所以  
無敵也

26 今乃棄黔首以資敵國 却賓客以業諸侯 使天下之士 退而不敢西

向 裹足不入秦 此所謂藉寇兵而齎盜 糧者也

27 夫物不產於秦 可寶者多 士不產於秦 願忠者衆

28 今逐客以資敵國 損民以益讐 內自虛而外樹怨於諸侯 求國無危

不可得也

rlaa

## 捕蛇者說

- 1 永州之野 產異蛇 黑質白章 觸草木 盡死 以齧人 無禦之者
- 2 然得而腊之 以爲餌 可以已大風攣踠癘癘 去死肌殺三蟲
- 3 其始太醫以王命聚之 歲賦其二 募有能捕之者 當其租入 永之人

爭犇走焉

- 4 有蔣氏者 專其利三世矣
- 5 問之 則曰 吾祖死於是 吾父死於是 今吾嗣爲之十二年 幾死者數矣
- 6 言之 貌若甚慙者
- 7 余悲之 且曰 若毒之乎 余將告于莅事者 更若役 復若賦 則何如
- 8 蔣氏大慙 汪然出涕 曰
- 9 君將哀而生之乎 則吾斯役之不幸 未若復吾賦不幸之甚也
- 10 嚮吾不爲斯役 則久已疾矣
- 11 自吾氏三世居是鄉 積於今六十歲矣 而鄉隣之生日蹙

12 殫其地之出 竭其廬之入 號呼而轉徙 飢渴而頓踣 觸風雨犯寒暑

呼噓毒癘 往往而死者相藉也

13 曩與吾祖居者 今其室十無一焉 與吾父居者 今其室十無二三焉

與吾居十二年者 今其室十無四五焉

14 非死則徙耳 而吾以捕蛇獨存

15 悍吏之來吾隣 呌齟乎東西 隳突乎南北 嘩然而駭者 雖鷄狗不得寧

16 吾恂恂而起 視其缶而吾蛇尚存 則弛然而臥

17 謹食之 時而獻焉 退而甘食其土之有 以盡吾齒

18 蓋一歲之犯死者二焉 其餘則熙熙而樂 豈若吾鄉隣之旦旦有是哉

19 今雖死于此 比吾鄉隣之死 則已後矣 又安敢毒耶

20 余聞而愈悲

21 孔子曰 苛政猛於虎也 吾嘗疑乎是 今以蔣氏觀之猶信

22 嗚呼 孰知賦斂之毒 有甚是蛇者乎

23 故爲之說 以俟夫觀人風者得焉

## 後赤壁賦

1 是歲十月之望 步自雪堂 將歸于臨臯 二客從予

2 過黃泥之坂 霜露既降 木葉盡脫 人影在地 仰見明月 顧而樂之

行歌相答

3 已而歎曰 有客無酒 有酒無肴 月白風清 如此良夜何

4 客曰 今者薄暮 舉網得魚 巨口細鱗 狀如松江之鱸 顧安所得酒乎

5 歸而謀諸婦 婦曰 我有斗酒 藏之久矣 以待子不時之需

6 於是携酒與魚 復遊於赤壁之下

7 江流有聲 斷岸千尺 山高月小 水落石出 曾日月之幾何 而江山不

可復識矣

8 予乃攝衣而上 履巉巖披蒙茸 踞虎豹登虯龍 攀棲鵲之危巢 俯馮

夷之幽宮

9 蓋二客之不能從焉 劃然長嘯 草木震動 山鳴谷應 風起水涌

10 予亦悄然而悲 肅然而恐 凜乎其不可留也 反而登舟 放乎中流

聽其所止而休焉

11 時夜將半 四顧寂寥 適有孤鶴 橫江東來 翅如車輪 玄裳縞衣 戛

然長鳴 掠予舟而西也

12 須臾客去 予亦就睡 夢一道士 羽衣翩跹 過臨臯之下 揖予而言

曰 赤壁之遊樂乎

13 問其姓名 俛而不答

14 嗚呼噫嘻 我知之矣 疇昔之夜 飛鳴而過我者 非子也耶

15 道士顧笑 予亦驚悟

16 開戶視之 不見其處